

Lizeoa Kanbotik Baionara

Heldu den irailetik aitzina, Kanboko Bernat Etxepare lizeoa Baionako Jean Jacques Rousseau ikastetxera joanen da. Daniel Elduairen zuzendariak garrantzitsu horren nondik norakoak azaldu dizkigu.

Kanboko Xalbador ikastegiak 323 ikasle ditu egun. Herri Urrats-en lortutako diruari esker eta mugaz bi aldeetako jendeen laguntza paregabeari esker, urte urte eraikin eta instalaketa berriak altxatzen aritu dira. Lehenik Xalbador ikastegiaren lurraldea eta eraikuntza erosi zuten. Ondotik ezker pareta estalia. Segidan bi solairu dituen eraikuntza berri-berria egin zuten hiru urtetako lanaren ondotik. Azkenik, berriz, kanpoko jolastokia ezarri zuten ordu eta jende askoren borondatezko lanari esker.

Gauza guztiek bezala, honek ere bere muga duenez, heldu den ikasturtetik aitzina aldaketak izanen dira. Kolegioko ikasleak (11tik 14 urtera) bertan geldituko badira ere, lizeokoek (15etik 18ra) *emigratu* egingo dute.

Gisa horretan, heldu den urtean lizeoko 75 ikasle Jean Jacques Rousseau ikastetxera joanen dira. Baionako ipar-mendebaldean, orain dela bi urte haur eskasiagatik hustu zen 600 ikaslerentzako tokia duen eraikuntza. Igerilekua, ezker pareta, rokodromo, futbol eta saskibaloiko kirol instalakuntza garrantzitsuen ondoan, lizeokoek egitura egokia izanen dute. Horiekin batera, berriz, Baionako Oihana ikastolakoak izanen dituzte alboan. Izan ere, Oihana Ikastolako ama-ikastola (2tik 5 urtera) eta lehen maila (6tik 10 urtera) arrunt desagokiak diren etxetoetan daude egun, eta behin-behinekoz bada ere Rousseau izanen dute 1996-1997 ikasturterako kokagune 120 gaztetxok baino gehiagok.

Daniel Elduairen Seaskako lizeoko zuzendariak azaldu duenez, Kanbotik azken hiru mailak etorriko dira beraz, eta Kanbon Kolegioa bakarrik gelditu. Gisa horretan, aurreko bukatuko duten 20 ikasleak eta Baionara doazen 75ek lekuak hustuko dituzte, seigarren mailan (11 urte) bertze 70 sartzeko.

Ildo horretatik Baionan Bigarren (BBB2) irakaskuntza orokorra egingen bada ere, Lehen (BB3) hirugarren espezializazioa abiatuko dute. Gisa horretan Lehen Literarioa eta Lehen



Baionako Jean Jaques Rousseau ikastetxea.
HUR GOROSTIAGA

Zientifikoarekin batera, aurreko Lehen Ekonomi eta Gizarte saila (ES) hasiko da. Terminalean (UBI), berriz, Literarioa eta Zientifikoa izanen dira aurreko, eta heldu den urtean ESren segida eta bukaera egingen dute.

Rousseaura joatea hitzartua baldin badago ere, oraindik paperean sinatzeke dago zehaztasun osoz. Dena dela, urtero erreberitu beharreko kontratua izanen da. Elduairen arabera, egoitzak «egoera onean» daude, nahiz eta pintura kolpe bat eta zenbait konponketa ttiki beharrezkoak dituen. Lizeokoek bi solairu oso-osorik izanen dituzte berentzat; hamar gela guztira. Lehen mailakoentzat zeinbait lan izanen dira egiteko, egoitza jatorrian ez baitago adin horietako haurrentzako egina.

Diru gastua, aldiz, altzaritan izanen da. Horrez gain, administrazio materiala eta laboratoriorio

eta gisa horretako material pedagogikoa egonen da, Kanborekin bikoiztu beharko baitute. Horretarako dagokien botere publikoetatik eta Herri Urrats eta Seaskatik heldutako dirua ezinbestekoa izanen dute.

Irakasleei dagokienez, Hezkuntza Nazionalaren pean daude horiek. Zuzendariak azaldu duenez, ahal delarik Baionan eta Kanbon kokatzea espero dute, baina batzuek Baiona-Kanbo-Baiona bidaia egin beharko dute.

Heldu den urterako guti gorabehera dena finkaturik badago ere, kezka ageri da barnetegiarrekin. Hastapeneko asmoa denek Kanbon lo egitea zen, baina aurreko justu ibiliko direnez, heldu den urterako bertze aukeraren bat asmatu beharko dute. «Baionan segurtasun eta bestelako norma guztiei erantzungo liekeen barnetegia egitea garestiegia litzateke», dio Elduairenek.


Kolegio eta lizeo bikoizketa

LIZEOAREN etorrerarekin Kanboko instalakuntzek arnasa hartzen ahalko dute pixka bat. Baina lau urteren buruan berriz ere topera iritsiko dira. Bizkitartean, Oihana Ikastolak egitura berezkoa eta Baionako Jean Jacques Rousseau ikastetxearen egoitzetan kolegioa bideratzea ere xede dute. Gisa horretan, kolegioa eta lizeoa bikoizturik izanen ditu Seaskak laster; Baionan eta Kanbon.

Etorkizunari buruz, Ipar Euskal Herriko ikastolen helburuetarik bat barnealdean kolegioa eta lizeoa ezartzea izanen da. Baina momentuz zaila gertatzen da. Izan ere, Maule, Garazi edo Donapaleun ezarriko litzatekeen ikastetxe bakarrak ez lieke bertze bien beharrei erantzunen, geografikoki elkarrengandik aski urrun baitira hirurak.

Afera hori arraposki eta denboraz gogoetatzekoa izanen dute Seaskako kideek heldu diren urteetan, ezinbesteko pauso garrantzitsua izanen baita ikastola eta euskararen garapen normala gauzatzeko Ipar Euskal Herrian.

Heldu den ikasturteari dagokionez, Seaskako Bigarren Mailak (11 urtetik 18 urtera) kanpaina berezia prestatuko du udari begira. Eskola elebidunetatik eta berez euskaraz dakiten haurrei Seaskan sartzeko aukera eman nahi die, beren ikasketak osoki euskaraz buka dezaten. Horrez gain, geroz eta gehiago dira Hegoaldetik etortzen diren ikasleak urte batez edo biz Ipar Euskal Herrian ikastera. Bi ikasle tipo horientzako ikastaro bereziak ere prestatzeko asmoa bada.



3. Askatasunaren karrika - 64700 HENDAYA
☎ 59480448 - Faxa: 59208271

